



SAMKEPPNISEFTIRLITIÐ

Fimmtudagur, 23. október, 2008

Ákvörðun nr. 57/2008

Kaup Gámaþjónustunnar hf. og Furu ehf. á hlutum í Efnamóttökunni hf.

1.

Þann 19. september 2008 annars vegar og 26. september 2008 hins vegar bárust Samkeppniseftirlitinu samrunaskrár þar sem tilkynnt var um kaup Gámaþjónustunnar hf. og Furu ehf. á hlutum í Efnamóttökunni hf. Samrunaskrárnar taka mið af viðauka í reglum nr. 881/2005 um tilkynningu samruna.¹ Í samrunaskránum kemur m.a. fram að með kaupum þessum muni Efnamóttakan vera til helminga í eigu Gámaþjónustunnar og Furu og félagið rekið áfram sem sjálfstætt félag með sjálfstæðan efnahag. Samrunaskránum fylgdu afsöl vegna kaupanna auk ársreikninga samrunaaðila fyrir árið 2006 og 2007 þar sem m.a. er að finna upplýsingar um veltu félaganna.

Að mati Samkeppniseftirlitsins fela kaup Gámaþjónustunnar og Furu á Efnamóttökunni í sér samruna í skilningi 17. gr. samkeppnislaga, og fellur þessi samruni undir samrunaeftirlit 17. gr. a laganna þar sem veltuskilyrði eru uppfyllt.

2.

Í samrunatilkynningum segir að Gámaþjónustan sérhæfi sig í þjónustu á sviði sorphirðu og taki þjónustusvið þess til allra þátta almennrar sorphirðu, frá innsöfnun á heimilissorpi til söfnunar og flutnings á spilliefnum. Þá bjóði félagið upp á vinnuvélaflutninga, leigu á vinnuskúrum, þurrsalernum og götusópun. Fram kemur að tilgangur Furu samkvæmt samþykktum sé alhliða byggingastarfsemi, trésmíðavinna, málmvinnsla, innflutningur, útflutningur, rekstur fasteigna og lánastarfsemi en skráð starfsemi félagsins sé niðurrif á ónýtum hlutum. Frá árinu 1993 hafi reksturinn að mestu leyti falið í sér móttöku málma og brotajárns. Í tilkynningunum segir jafnframt að Efnamóttakan sérhæfi sig í meðhöndlun og frágangi á spilliefnum til eyðingar og endurnýtingar.

3.

Í samrunatilkynningunum kemur fram að Gámaþjónustan og Fura áttu fyrir umrædd kaup sinn hvorn hlutinn í Efnamóttökunni. Félögin ákváðu vorið 2007 að gera tilboð í hluti Sorpu bs. og Endurvinnslunnar hf. og var þeim tilboðum tekið í júní 2007.

¹ Viðauki með skrá yfir upplýsingar sem þurfa að koma fram í tilkynningu til Samkeppniseftirlitsins um samruna fyrirtækja (samrunaskrá).



Að mati samrunaaðila starfa félögin á þremur aðskildum mörkuðum. Segir að Gámaþjónustan starfi á markaði fyrir sorphirðu og tengd umhverfismál. Þá segir að starfsemi Furu sé fyrst og fremst í málmendurvinnslu og starfsemi Efnamóttökunnar felist í meðhöndlun og frágangi á spilliefnum til eyðingar eða endurnýtingar.

4.

Við mat á samkeppnislegum áhrifum samruna ber að líta til þess hvort samruninn hindri virka samkeppni með því að markaðsráðandi staða verði til eða slík staða styrkist, sbr. 17. gr. c samkeppnislaga. Í 4. gr. samkeppnislaga kemur fram að markaðsráðandi staða sé fyrir hendi þegar fyrirtæki hefur þann efnahagslega styrk að geta hindrað virka samkeppni á þeim markaði sem máli skiptir og það geti að verulegu leyti starfað án þess að taka tillit til keppinauta, viðskiptavina og neytenda. Kaup Gámaþjónustunnar og Furu á Efnamóttökunni flokkast undir samruna í skilningi samkeppnisréttar en athuganir Samkeppniseftirlitsins gefa hins vegar ekki til kynna að samruninn muni hafa skaðleg samkeppnisleg áhrif.

Í ljósi þessa og með hliðsjón af öðrum gögnum málsins er það mat Samkeppniseftirlitsins að ekki sé ástæða til að aðhafast frekar vegna kaupa Gámaþjónustunnar og Furu á Efnamóttökunni grundvelli 17. gr. c samkeppnislaga.

Ákvörðunarorð:

„Með kaupsamningum, dags. 28. júní 2007 og 5. júlí 2007, keyptu Gámaþjónustan hf. og Fura ehf. allt hlutafé Sorpu bs. og Endurvinnslunnar hf. í Efnamóttökunni hf. Samkeppniseftirlitið telur að ekki sé ástæða til að aðhafast frekar vegna umrædds samruna á grundvelli 17. gr. samkeppnislaga“

Samkeppniseftirlitið

Páll Gunnar Pálsson